

О Дујто Послание җико Солунјајна

Җики црква ко Солунјајна

1 ¹ О Павле хем о Силван хем о Тимотеј җики црква е Солунјаненге ко Девел, амаро Дат хем о Господари о Исус Христос: ² Благодат туменге хем мир таро Девел амаро Дат хем о Господари о Исус Христос.

³ Дужна сијем секогаш те благодарина е Девлеске баши туменге, пхрајљален, сар сој тано право, соске тумари вера бајрола бут; хем умножинелапес о мангипе машкар туменде секоле јеке тумендар, ⁴ аґар со амен коркори фалинајамен туменцар машкар е Девлескере цркве баши тумаро трпение хем вера ко са тумаре прогониба хем муке, со поднесиненален.

Е Христоскоро ајбе е ангеленцар ки Пли слава

⁵ Одовај знако баши о праведно Девлескоро судо, за да те рачунинен тумен достојна баши е Девлескоро Царство, баши кова хем җидена. ⁶ Соске тано праведно англо Девел те иранел мука околенте со мучинена тумен, ⁷ а туменге, е мучименге, локхипа заедно аменцар, кога ка јавинелпес о Господари о Исус таро небо, е ангеленцар ки Пли сила, ⁸ ко пламено јагакоро, за да те дел одмазда околенте кој на пенцарена е Девле хем кој нае послушна баши о Евангелие амаре Господарескоро о Исус Христос; ⁹ кој ка овен казниме вечно уништибаја дур таро муј е Господарескоро хем тари слава Олескере силатар, ¹⁰ кога ка авел, ко одова Диве, те прославинелпес ко Пле светие хем те восхитиненпес Олеске са о верна, соске тумен поверујнген амаре сведоштвосте.

¹¹ Одолеске хем молинајамен секогаш баши туменге: амаро Девел те рачунинел тумен достојна баши о позив, хем те исполнинел секоја шукар војља ко шукарипа хем о дело тумаре веракоро ки сила, ¹² за да те прославинелпес о анав амаре Господарескоро о Исус, ки туменде, хем тумен ки Лесте, пали благодат амаре Девлескири хем о Господари о Исус Христос.

О Мануш е Безакониескоро

2 ¹ Молинаја тумен, пхрајљален, увеза баши о ајбе амаре Господарескоро о Исус Христос хем баши амаро кхедиба заедно ки Лесте, ² ма дозволинен

сигате те предомислинен тумен ки тумари годи, ниту те даран ни таро духо, ни таро слово, ни таро послание, сар те пхене тано амендар бичхавдо, сар веќе ало е Господарескоро Диве!³ Никој тена ховавел тумен ко било саво начин, соске одова нае те случинелпес џикоте прво на авела о периба хем на појавинелапес о мануш е безакониескоро, о чхаво е уништибаскоро,⁴ кој противинелапе хем вазделапе упредер о са со ваќерелапе Девел или светина, аѓар со ка бешел е Девлеске ко храми хем ка престајнелпе пес дека ови тано Девел.

⁵ На сетинена ли тумен дека ваќерѓум туменге акава панда кога сијум сине туменде? ⁶ Хем акана џанена со задржинелале за да те појавинелпес ов допрво ко пло време. ⁷ Соске, и тајна е безакониескири веќе делујнела, само те отстранинелпе таро машкар окова, кој акана задржинелала,⁸ хем тогаш ка јавинелпес о безаконико кас о Господари ка мудареле Пле здивеја таро Пло муј хем ка уништинеле е појаваја таро Пло ајба.

⁹ Одовај тано окова, каскоро ајбе тано според о сатанско делујбе, секоле силаја, хем чудесно знаконцар хем ховавне чудонцар,¹⁰ хем секоле неправедно ховајбаја, баши околнге кој мерена, соске на приминге о мангипе ко чачипе за да те спасинелпес.¹¹ Хем одолеске о Девел ка бичхалел ленге уверливо заблуда, за да те верујнен ко ховајба,¹² та те овен осудиме сарине, кој на поверујнге ко чачипе, а синелен задоволство ки неправда.

Терѓовен цврсто

¹³ А амен сијем дужна секогаш те благодарина е Девлеске баши туменге, пхрајљален, таро Господари мангле, соске о Девел избиринѓа тумен таро почеток баши спасение, преку осветување е Духоскоро хем вера ко чачипе,¹⁴ ко кова повиќујнѓа тумен преку амаро Евангелие, за да те добинен и слава амаре Господарескири о Исус Христос.¹⁵ Тогаш, пхрајљален, терѓовен цврсто хем иќерен о учење со сиклиленлен амендар, било преку слово или преку амаро послание.

¹⁶ А коркори о Господари амаро о Исус Христос хем о Девел амаро Дат, Кој замангљамен амен хем денѓамен вечно утеха хем шукар надеж пали благодат,¹⁷ те утешинел тумаре срциа хем те зојраќерел тумен ко секова шукар дело хем слово!

Молинен тумен баши аменге

З¹ Најпосле, пхрајљален, молинен тумен баши аменге, та е Господарескоро слово те прастал хем те прославинелпе сар хем ки туменде, ² хем аменда те ослободинамен таро румиме хем билачхе мануша, соске саринен наелен вера. ³ Ама верно тано о Господари, Кој ка зојраќерел тумен хем ка запазинел тумен таро лукаво. ⁴ Увериме сијем ко Господари, баши туменге, дека ќерена хем дека ка ќерен окова со заповединаја туменге. ⁵ А о Господари те управинел тумаре срциа ке Девлескоро мангипе хем ко трпение е Христоскоро!

Циден тумен таро неуредно живото

⁶ А туменге заповединаја, пхрајљален, ко анав амаре Господарескоро о Исус Христос, те одвојен тумен таро секова пхрал, кој водинела неуредно живото, а на пало учење, со приминген амендар. ⁷ Чаче, коркори џанена сар требела те углединен тумен аменде, соске амен на владингем неуредно машкар туменде, ⁸ ниту халем некаскоро маро, него ќергем бути трудоја хем ко напор, и рат хем о диве, за да тена ова ко терет некаске тумендар. ⁹ На баши одова со на сине амен право ко одова, него за да те ова коркори аменге баши пример за да те подржиненамен. ¹⁰ Соске хем кога сијем сине туменцар, заповедингем туменге акава: ако некој на мангела те ќерел бути, нека хем мате хал!

¹¹ Уствари, шунаја дека некој машкар туменде живинена неуредно, ништо на ќерена бути, него залелепе чуче буќенцар. ¹² Асавкенге заповединаја хем опоменинајален ко Господари о Исус Христос те ќерен бути мирно хем те хан пло маро. ¹³ А туменге, пхрајљален, тена досадинелпе те ќерен шукар!

¹⁴ Ако пак некој на шунелале амаро слово преку о послание, обележиненле хем ма мешинен тумен олеја, за да те лаџал. ¹⁵ Ама ма рачуниненле баши непријатели, него предупрединенле сар пхрал.

О последна поздравиа

¹⁶ А коркори о Господари е мирескоро те дел тумен мир секогаш хем ко секова начин. О Господари те овел сариненцар туменцар!

¹⁷ Поздрав мле вастеја, е Павлескоро: одовај тано белого ко секова послание, пишинава аѓар: ¹⁸ и благодат амаре Господарескири о Исус Христос те овел сариненцар туменцар.